

Lecture Week 6 Local governments – Pulega a matai (fono), Aulotu 15/3/2024

Levi Tavita

A talanoa i pulega faalenuu local government, o le mea e ao ona silafia, e le i iai i totonu o le faavae o Samoa se faamatalaga i lea pulega. Faato'a tusia se Tulafono e limata'ita'i ai nuu i le 1990 ma le 1995. Ae sa iai le Laulau (board) faavae i le 1954 e faatonu ai pulega o itumalo ma Nu'u, taimi o niu Sila, ae na lei toe faaauauina pe faamauina e ala i le faavae fou o le 1962. Ona o lea lape, na mafua ai ona mau eseese le malo ma pulega faalenuu, ma faapea ona o lē gatusatusa ai, e a le malo e faamamafa le temokarasi, ae o le nuu e faamamafa tulafono faalenuu Samoa. O le mea o loo misi i la'u matau i le Tulafono 1990, ma le 1995, o le le faailoaina o le pule a le lotu. E malamalama lava lea itu, aua o le taofi masani, o le lotu e i lalo o le pule faamalumu a le faamatai.

Peita'i o la'u finau ma le mau. E lua pulega i totonu o nuu ta'itasi i Samoa. Muamua, o le pulega a matai poo alii ma faipule. Lua o le pulega a le lotu e ala i ekalesia ua faavaeina ai. O le fono a matai e fale ai mataupu taule nuu i lona tausiga o le nofolelei ma soo se mataupu lava e aafia ai le nuu ma ona tagata e alala ai. O le fono a le aulotu poo aulotu e fale ai mataupu tauekalesia ma e faalelotu ona sini ma faamoemoega. Alu a'l ua sui foi le faamamafa, iai nisi ekalesia ua latou apoina tiute faalenuu sa na o le fono a le nuu e faia. A tilotilo i le ata o le nuu I nei aso, ua fai e le lotu le faiva faamaopoopo – autalavou, fanau laiti i aoga aso sa, tina I a latou mafutaga, tama i ai latou mafutaga. Ua mou atu le faataulele'a, le aualuma, saofa'iga a faletua ma tausisi ma tulaga faapena. O lea ua fai e le lotu lena tiute.

E tutu to'atasi pulega e lua e le feaiaa'i se'i vagana o mataupu e moomia ai le galulue faatasi. Pulega faalenuu e tu i luga o le pule a matai e apepele e tu ma aga e iloa faatasi ma lea pulega, i le va o tamalii ma faleupolu, ma faapea ona faavasega ai tiute i lana e fai i upufai o aiga atoa ma le nuu. O le taofi, o tamalii e tau'avea mamalu o se afioaga ma faufautua, a o tulafale e faia tonu ma faatino fuafuaga masani; e foliga o le maliega lea ua loa ona taoto mai ai upufai faalenuu Samoa e pei ona molimau misionare. Ae mautinoa e iai foi nisi nuu e ese mai pe atonu e malosi le leo o tamalii i tonu fai o nuu. E iai foi nuu ua ou faalogo i ai e **to'atasi a se matai e faia tonu.**

Se'i o'u aumaia se faata'ita'iga i le afioaga o loo ou nofo ai. Tautala foi ma le ava aua e le o so matou nuu. O le afioaga lea e lua ona alii ta'i poo suafa. O le tasi o lona faalagiga o le sa'o alii, a o le isi o lona faalupega o le sa'o fetalai. Lona uiga e faamaepaepa le tasi ae avanoa le isi e fetalai mo i laua. E to'alua fo'i tulafale fai upu, e tasi lo la faalupega o le Matua Fetalai. E tutusa lelei a la aia i le galuega faafaleupolu, e fetalai aua le paia i suafa ma le nuu atoa. E leai se tasi o i laua e faumalo i le lauga, ae fai la la galuega i le ava fatafata ma le va fealoaloa'i. E

foliga e lua saofa'iga – o le saofa'iga a suafa ma le nuu o tulafale, e femolia'i le tofa ma le faautaga i nei saofa'iga e lua. E iai foi taimi e lauga ai le sa'o fetalai ae tapua'i tulafale e to'alua ma le sa'o alii, ae faatino lava i le va fealoaloa'i e aunoa ma se faumalo o se vaega.

Ae e lei uma la'u tala, e iai foi isi tamalii o le afioaga ma tulafale, e iai foi o latou tulaga i totonu o le nuu e tusa i tiute. Molimau nisi o tulafale o le nuu, e le i va lava lo latou nuu pe alualu lua ni faiganuu, ne'i o'u sese, ma sa ou nofo ma tomanatu i ai, pe atonu e mafua lea i le faata'otoga, e lua tapa'au lua tulafale fai upu, e tumua'i tutusa i le pule, e mafua ai ona faamalosia le agaga o le soalaupule i a latou tonu fai.

O isi nuu e tasi a se tapaau. O lo matou nuu i le Tuamasaga. E iai lona alii ta'i, e faalagi o le Tapa'au Faasisina, ma isi ona faalupega. E iai ona aiga i isi foi suafa faalupea o le nuu, ma le saofa'iga o faleupolu e faia le faiva o le tautua upu, ta'ua lo latou to'oto'o o Auimatagi, e to'afitu tulafale e aofia ai i lea saofa'iga. E leai se tootoo muamua, e tutusa uma lava a latou aia i le fue ma le tootoo pe a saili se tasi e fetalai mo le tapaau ma aiga. La lea e faatino le latou galuega ma le va tootoo i le ava fatafata ma le va fealoaloa'i. I faiā a le pule i lea fo'i nuu, e foliga e malosi ma tutasi le malelega a le nofo, poo le Malietoa. O le malelega e le agaia, mai lava i le amataga. A fonoa Vaopipi i se mataupu taua, ona momoli lea le tofa ma le faautaga i se autasiga i le nofo i lona maota, poo le a sona finagalo i ai. Ae i tulaga masani o faiganuu ma lona tausiga, e faatino lava e aiga ma le faaleupolu, e aunoa ma le tapa fua i lo latou tapa'au.

Ui lava la ina foliga e maioio galuega a tamalii ma faleupolu i nuu Samoa, ae eseese lava faiga e faatino ai pulega ma taupulega a lea nuu ma lea nuu.

A aotele se faamatalaga, o pulega faalenuu e faavae i le soalaupule ma le autasiga (consensus), e avatu aumai se mataupu ae tausili lava i se autasiga e malilie uma i ai le aufono. I pulega faatemokarasi e mafai ona faamauina lou finagalo e 'au ese i se faaiuga ua faia. Lea tatou te matauina i fono a le palemene. Ae le faapena i fono a matai i afioaga, a saunoa loa se tapa'au e lagolago le mau a tulafale, o lena e tatau ona malilie uma i ai. Afai e iai se matai e faasalaese pea, e ono feagai ia ma ni puapuaga o se faasalaga ma tulaga faapena. A faigata se mataupu ona moa lea le toa ae se'i saili atili le tofa ma le faautaga i miti o le po ma le tomanatu, foi mai ua maua isi manatu fou.

O le pulega lona lua o lena a le Lotu, aofia ai ekalesia uma i totonu o se afioaga e tasi. Ua molimauina le malosi o le faatemokarasi i pulega faaekalesia, atonu e mafua mai i faavae o nisi o ekalesia e iai le EFKS, Metotisi foi, e faataua ai leo o tagata lotu uma. A fai lou matafale poo lou tofi tiakono, ua fai lou leo i totonu o upufai o le ekalesia. E vasaga tutusa ai lau faiā i le pule ma lena o le isi suilotu e le matai pe matai foi. Taimi nei o loo foliga e ave pea le faamua i

tamalii ma failauga o nuu pe a fonoa ekalesia, ae i le matau atu i suiga ua tula'i mai, niu Sila mo se faata'ita'iga, e foliga ua ave le faamua i le na mua mai i le lotu, tusa pe le matai. Manatua o aulotu i Niu Sila e le o ni nuu mavae, lona uiga e le faigofie foi lona asaina o lea vasa laolao mo o tatou tagata. A saili se tonu o se mataupu, O nisi taimi ua malilie faatasi (consensual), o isi taimi ua su'e le faaiuga i le palota (majority vote).

A faatusatusa pulega e lua, e foliga mai e fetoa'i, ma o le tasi lea luafesasi o pulega i lea ua ou ta'ua o le saofa'iga o le nofoapule i Samoa. Ae pei ona ou ta'ua, ua feuluulua'i auala o pulega, a ua siliga i le malilie autasi, saili loa i le palota. I lalo o le faavae ma pulega faalelotu e avanoa tutusa tagata uma i tofiga. I lalo o le faavae ma pulega faalenuu e le faapena, afai o lou faasinomaga o le suafa tulafale o Mosooi, o lou lena e te mitamita ai. Ae e te le au i le suafa Niutea auā e le sou tofiga lena. Pei o le upu, o Samoa ua uma ona tofi. I le lotu, e le faapena, e fesuisuia'i lava, e fuafua lava i agavaa, poo se ua tasi i ai le tofa e tauavea se tofi.

La lea i nei aso, ua sui e le poto ma le mautofi le ta'otoga o mea. Pe e te suafa i se suafa faaleiloga ae afai e te faipule pe e te faifeau pe polofesa, ua amana'ia foi oe i le saofa'iga. Lona uiga, ua tatala e le temokarasi – poo le lotu foi - le auala o avanoa mo le to'atele sa lei iai muamua.

Tulafono o Pulega Faalenuu 1990, Tulafono Lotoifale 1995

E lua Tulafono o loo faavae ai pulega faalenuu i Samoa. Se'i tatou tilotilo muamua lava i le Tulafono o Pulega Faalenuu 1990. Na pasi le Tulafono lena e le HRPP ina ia faamanaina pe faamalosi ai pulega faalenuu, taimi o Tofilau. O le pule na toina atu e ala i le Tulafono e aofia ai faasalaga i solifulafono mama, lagolago i fuafuaga a le malo i le faaogaina tatau o eleele ma punaoa faalenatura, fesoasoani i galuega a matagaluega o le a tausia lena tulafono, galulue faatasi ma matagaluega a le malo i soo se fe'au e atina'e ai nuu ma afioaga. O isi sini autu o le tulafono e aofia ai le tausiga lelei o fanua faaleaganuu atoa ai se faata'otoga lelei o Apia ma lona atina'e aemaise le tula'i mai o alalafaga fou e taulata i ai.

O isi tiute e auala mai i le tulafono o le Lotoifale 1995 (Internal Affairs) ma le Tulafono faavae o le matagaluega o Tina ma Tamaitai, Atina'e o Afioaga ma Aga fesoata'i, o loo ta'ua ai le sao o le lotu, le faatauaina o le sao o tina ma tamaitai, sa lei ta'ua i Tulafono o le 1990 ma le 1995.


I le faaofi mai o le Tulafono 1990, na peisea'i o se malosia lea na toe fagua ai faasalaga e pei o le ati ma le lau poo le soloa i le 'aufuefue, ma faapea ona fetoa'i ai le faamasinoga ma le pule faamatai. E iai molimau e faamaonia ai. Ma o se mataupu lea o loo faauliulito pea ma faamalumu ifo i luga o le nofoapule a Samoa poo le malo tutoatasi o Samoa. O fea e tua'oi

ai le malosi o le pule faamatai ma lena o le pule faalemalo? O le popolega foi, Afai e aia pea le pule faalemalo i le pule faamatai ona le toe nanea lea se upu e fai atu e alii ma faipule o nuu. O luafesasi ia o loo feagai ma i tatou pe a talanoa i le pule ma ana faiā.

O le tasi o mataupu e fesoota'i i le Tulafono o lena i pulega i totonu o nuu fou, nuu ia ua tupu ma ola foi e taulata i Apia. O nuu fou nei e le o aofia i le faata'otoga o nuu mavae, ui ina faitauina e nisi e fua i vaega o le atunuu poo itumalo mavae o loo maua i ai. E manino lenei mea, o nuu nei e aofia i lalo o pulega faatemokarasi, e avea ai le lotu ma auala e taupule ai i latou e alala ma papa-aa ai. E ese fo'i mana'oga o nei alalafaga fou, ma e malamalama i ai nisi o tatou o loo alala ai i nei nofoaga.

O le sootaga o le malo ma le nuu e ala i le tulafono, o le tofi o le pulenuu, lea ua toe faalupe nei o le Sui o le Nu. Sa iai le taimi na vesia ai le palemene i le a tonu le galuega a le sui o le nuu poo le pulenuu. Fai mai le faitioga a le itu agai, o le vaega lenei o loo faia faatosina a le malo i nuu ina ia palota mo le malo. Ae e manino le faavae o le tofi, e le tatau ona aafia le sui o le nuu poo le faipule i ni tulaga faapea, pe faaitu'au ae fai pea lana galuega ma le faamaoni.

Pulega faamatai i le nofoapule a Samoa: confluence of power in Samoa



E mau eseese le 'aufaitofa i le tulaga o le malo fou – modern state, i totonu o atunuu poo sosaiete. E leai foi se fua e fua ai se 'autasiga. Ou te lagolagoina le mau e faapea, e leai se malo e tuto'atasi na o ia, peita'i o se pule e iai ni ana faiā ma isi foi pule. E iai le faaupuga state in society, ae le o le society in the state. Ou te 'au foi i le mafaufauga lenei, e iai le ata e pei ona ou tou silasila mai i ai, e tolu pule i Samoa i la'u faatulagaga – Pule tuai e faaigoa ai le faamatai sa pulea Samoa mai augatupulaga e oo mai lava i nei aso. Pule fou e faaigoa ai le Lotu, pulega o tala ma ripoti faasalalau (media), ma le Setete poo le malo faaonaponei ua fauina a'e i taofi faatemokarasi ma ata o pulega faapalemene a Peretania.

Talu ai o lo tatou sosaiete o iai nei ua fauina a'e i nei malosia'aga e tolu, o lea ua avea ai lo tatou faavae o se malosiaaga ese e fefiloi ona elemene, pe o le pule ua feuluulua'i, power diffusion, o mea mai le pule tuai (matai, tu ma aga mai anamua, faaaloalo, mnf), o mea mai le pule fou (pulega faalotu mai fafo, gagana, manatu fou ma aga fou o talanoaga, faavaa fou o pulega), atoa foi le malo, i ana Tulafono ma aga o pulega faatemokarasi, ua fauina ai se sosaiete fou poo se aganuu fou, lea ua faaigoaina e le alii faitofa o Gramsci, o le aganuu fuao poo le fuao faaleaganuu. O lona uiga, o se aganuu ua faufauina i elemene o malosiaaga eseese e faamata e le faigofie ona agaia, fesiligia pe lu'iina fo'i.

Ou te aumaia le faata'ita'iga, i le matai ua avea ma faipule o le itumalo, ua avea ma minisita a le malo, a o ia foi o le tiakono poo le a'oa'o fesoasoani a lana aulotu; a le o lona foi o ia le failauga poo le ta'ita'ifono o le komiti a lana ekalesia. O lona faletua o le CEO o le matagaluega a le malo, o ia foi le faatina o le mafutaga a tina i lo latou afioaga. O lenei la matai, o ia le faatusa (symbol, metaphor, analogy) o lona pule fuao faaleaganuu ua soosoina ai le pule i ona vaega uma. Pe i le gagana o nei aso, e tele pulou o le tamaloa. O lona ua faigata ai ona tavae tua'oi o le pule, e mafua ai le upu feuluulua'i, power diffusion.

Ona tatou o'o mai loa lea i le vaega lenei: **O lu'itau o loo feagai ma nuu poo pulega faalenuu i nei aso.** O le a taumafai e aotele atu ona o le manumanu i le taimi.

O lona ua ou tou silafia ma tatou iloa le vao lu'itau ua feagai ma nuu, aua o tatou o sui o nuu ma afioaga. Lu'itau muamua mo a'u lava ia o le tulaga i faatupula'ia o matai o nuu e ala i faiga saofa'i tetele a aiga. O a aafiaga o lenei aganuu mamalu a Samoa, pale i le matai ina ua afu le tautua, i le faiga ua iai nei? (Faata'ita'iga). Lua, o le ofi mai o vaega faaupufai e faavae ni faia ma nuu, ma faapea ona afaina ai le nofo lelei o tagata. Ona ua va se nuu i le fea itu e ave i ai la latou lagolago. O lona tou te silafia, e le tau talatalaina. Tolu, o le faaofia o ni tala'iga fou i totonu o nuu, tasi lea faafitauli e vesia ai nuu ona o le tu o le Tulafono i aia tatau a le to'atasi. Fa, o le amana'ia o tamaitai ma tina. O sauaga faasaga ia i latou o se fe'au e ao ona faamalosia i pulega faalenuu, e le tau fai atu. Ae e tele foi ma tutasi lona mataupu ua tou silafia lava.

Ma lenei e faaiu ai la'u faasoa, o le pule a le tupe i vaega uma o lo tatou soifuaga faalenuu. A iai se pule e ta'u o le sa'o o pule uma, e mafai ona ou fai atu, o le tupe. Aisea? Auā o lona malosia e mafai ai ona faatino a tatou miti, o tatou mana'o, na te tatalaina faitoto'a i avanoa e le laumaua. Peita'i ua avea foi ma se malosiaaga e suia faavae ta'oto'oto ma maopoopo o a tatou pulega, e pei ona iai le faasalafa o matai mo se faata'ita'iga. O se faiga e manatu ua faia e nisi matai sa'o mo i latou lava ma le tamaoaiga. E iai molimau e faamaonia ai la'u upu. E iai

le aiga e toe o tausaga uma e fai ai matai, e le lalo ifo o le tai 60 l le 100 matai, o le a le feau o loo ta'u mai? O lu'itau aupito malolosi na o loo feagai ma pulega faalenuu poo le faamatai l lenei lava taimi.

Ao telega o lau faasoa

Sa ou talanoa l pulega faalenuu e lua pulega – faamatai e ala l le fono a le nuu, ma le pulega faalelotu e ala l ekalesia. E eseese faatinoga o pulega l nuu taitasi, ae ua maioio lava tofiga o tamalii ma faleupolu. Sa ou talanoa l le eseese o na pulega, faapitoa le pule a le lotu ua mauavanoa ai le mamalu lautele i avanoa o tofiga ma faamanuiaga. Sa tatou talanoa l Tulafono e lua o loo faavae ai pulega faalenuu. Sa tatou talanoa l le feuluulua'l o le pule, e mafua ai ona feaiaa'l le nofoapule o le malo, lotu ma le faamatai. Ma le vaega mulimuli, o faafitauli o loo feagai ma pulega faalenuu i lenei taimi.

O le a faagata mai ai i 'i, ona o le manumanu i le taimi, ae o le a se'e atu loa i le tatou fetufa'iga lautele.

Group discussion

O a ni mea taua (points, issues) na e maua mai i le faasoa e tatau ona faailoa i lumamea mo se talanoaga lautele a Samoa?

Su'ega – Prior Knowledge

1. O ai le palemia o Samoa e ta'uta'ua i le faifaato'aga?
2. O le a le faiva o Tupua Tamasese Lealofi le IV a o lei avea ma palemia?
3. O ai le ulua'i faamasino sili Samoa na tofia i le malo tuto'atasi o Samoa?
4. O ai le ta'ita'i e ana le upu, O le mea e lelei mo Apia e lelei fo'i mo Savaii.
5. O ai Taulapapa Faimaala?
6. O ai le ta'ita'i o Samoa na tusia le tusi, la faagaganaina oe e le Atua Fetalai?
7. Sa'o pe Sese. O Tofilau Eti le palemia na sili ona umi lona taimi i le tofi palemia.
8. Sa'o pe sese. E sili atu le to'atele o Samoa i fafo nai lo Samoa i Samoa.
9. O ai le suafa o le faipule tama'ita'i na muamua i le palemene i lalo o le Tulafono 10 pasene?
10. Ta'u mai suafa o e sa umia le tofi ao o le malo, e to'atolu, e aofia ai le o loo iai nei.